

DECLARATION DV ROY,
Sur la Regence de la REYNE.

Verifiée au Parlement de Paris le 21. Avril 1643.

EOVIS par la grace de Dieu, Roy de France & de Nauarre; A tous presens & à venir, Salut. Depuis nostre aduenement à la Couronne, Dieu nous a departy si visiblement sa protection, que nous ne pouuons sans admiration considerer toutes les actions passées dans le cours de nostre regne, qui sont autant d'effets merueilleux de sa bonté. Dès son entrée, la foiblesse de nostre âge donna sujet à quelques mauuais esprits d'en troubler le repos & la tranquillité; mais cette main diuine soustint avec tant de force nostre innocence & la justice de nostre cause, que l'on vid en mesme tēps la naissance & la fin de ces pernicioeux desseins, avec tant d'auantage pour nous, qu'ils ne seruirent qu'à affermir nostre puissance. Depuis, la faction de l'Herésie s'esleuant pour former vn party dans l'Estat, qui sembloit partager nostre auctorité, il s'est seruy de nous pour en abatre la puissance; & nous rendant l'instrument de sa gloire, il a permis que nous ayons remis l'exercice de la Religion, & releué ses Autels abatus, en tous les lieux où la violence de l'Herésie en auoit effacé les marques. Lors que nous auons entrepris la protection de nos Alliez, il a donné des succès si heureux à nos armes, qu'à la veüe de toute l'Europe, contre l'esperance de tout le monde, nous les auons reestablis en la possession de leurs Estats. Si les plus grandes forces des ennemis communs de cette Couronne, se sont r'alliées contre nous, il a confondu leurs ambitieux desseins. Et enfin, pour faire paroistre d'auantage sa bonté enuers nous, il a donné benediction à no-

stre mariage, par la naissance de deux enfans, lors que nous
 l'esperions le moins. Mais si d'un costé Dieu nous a rendu le
 plus grand & le plus glorieux Prince de l'Europe, il nous a
 fait aussi connoistre, que les plus grands Roys ne sont pas
 exempts de la condition commune à tous les hommes; Il a
 permis au milieu de toutes ces prosperitez, que nous ayons
 resenty des effets de la foiblesse de la Nature. Et bien que
 les infirmittez que nous auons eu, & qui nous continuent en-
 core, ne nous donnent pas sujet de croire que le mal soit sans
 remede; & qu'au contraire nous ayons par toutes les appa-
 rences, vne assurance de recouurer vne santé entiere: neant-
 moins comme les euenemens des maladies sont incertains,
 & que souuent le jugement de ceux qui ont plus d'experien-
 ce sont peu assurez, Nous auons estimé estre obligez de
 penser à tout ce qui seroit necessaire pour conseruer le repos
 & la tranquillité de nostre Estat, en cas que nous vinssions à
 luy manquer. Nous croyons que comme Dieu s'est seruy
 de nous pour faire tant de grace à cette Monarchie, qu'il de-
 sire encore cette derniere action de prudence, qui donnera la
 perfection à toutes les autres. Si nous apportons vn si bon
 ordre pour le gouuernement & administration de nostre Cou-
 ronne, que Dieu nous appellant à luy, rien n'en puisse affoi-
 blir la grandeur; & que dans le bas aage de nostre Successeur,
 le Gouvernement soit soustenu avec la force & la vigueur, si
 necessaire pour maintenir l'autorité Royale; Nous croyons
 que c'est le seul moyen de faire perdre à nos ennemis toutes
 les esperances de prendre auantage de nostre perte: & nous
 ne pouons leur opposer vne plus grande force pour les obli-
 ger à vn traité de Paix, que de faire vn si bon establisement
 de nostre viuât, qu'il rallie & reünisse toute la maison Roya-
 le, pour conspirer avec vn mesme esprit, à maintenir l'Estat
 present de nostre Couronne. La France a bien fait voir,
 qu'estant vnie, elle est invincible, & que de son vnion dépend
 sa grandeur, comme sa ruine de sa diuision: aussi les mauuais

3

François seront retenus de former aucunes entreprises, jugeant bien qu'elles ne reüssiront qu'à leur confusion, lors qu'ils verront l'authorité Royale appuyee sur de si fermes fondemens, qu'elle ne pourra estre ébranlée: Enfin nous affermirons l'vnion avec nos Alliez, qui est vne des principales forces de la France, quand ils sçauront qu'elle sera conduite par les mesmes maximes, qui en ont jusques icy si heureusement & si glorieusement maintenu la grandeur. Nos actiōs passées font assez iuger de l'amour que nous auōs eu pour la conseruatiō de nos Peuples, & de leur acquérir par nos trauaux vne felicité accomplie: Mais la resolution que nous prenons de porter nos pensées à l'auenir avec l'image de nostre fin & de nostre perte, est bien vne marque plus asseurée de nostre tendre affection enuers eux, puis que l'execution de nos dernieres volontez, produira ses effets en vn temps où nous ne serons plus, & que nous n'aurons autre part en la felicité de nostre regne qui viendra, que la satisfaction & le contentement que nous receurons par auance, de penser au bon-heur de nostre Estat. Or pour executer nostre dessein, nous auons pensé que nous ne pouuions prendre vne voye plus asseurée, que celle qu'ont tenu en pareilles occasions les Roys nos predecesseurs. Ces sages Princes ont iugé avec grand' raison, que la Regence du Royaume, l'instruction, & education des Roys mineurs, ne pouuoit estre déposée plus auantageusement, qu'en la personne des Meres des Roys, qui sont sans doute plus interessées en la conseruation de leurs personnes, & de leur Couronne, qu'aucun autre qui y pourroit estre appellé. A CES CAUSES, de nostre certaine science, pleine puissance & autorité royale; Nous auons ordonné & ordonnons, voulons & nous plaist, Qu'auenant nostre decez, avant que nostre fils aîné le Dauphin soit entré en la quatorzième année de son âge, ou en cas que nostre-dit fils le Dauphin, decedast avant la majorité de nostre second fils le Duc d'Anjou; Nostre tres-chere & tres-amée

Espouse & Compagne la Reyne, mere de nosdits enfans,
 soit Regente en France, qu'elle ait l'education & instruction
 de nosdits enfans, avec l'administration & gouvernement du
 Royaume, tant & si longuement que durera la minorité de
 celuy qui sera Roy, avec l'aduis du Conseil, & en la forme
 que nous ordonnerons cy-apres. Et en cas que ladite Dame
 Reyne se trouuast apres nostre decez, & pendant sa regence,
 en telle indisposition, qu'elle eust sujet d'apprehender de finir
 ses jours auant la majorité de nosdits enfans; Nous voulons
 & ordonnons qu'elle pouruoye, avec l'aduis du Conseil que
 nous ordonnerons cy-apres à la Regence, Gouvernement &
 administration de nosdits enfans & du Royaume; Declarant
 dès à present, que nous confirmons la disposition qui en sera
 ainsi par elle faite; & voulons qu'elle sorte son plein & en-
 tier effet, comme si elle auoit esté ordonnée par nous. Et
 pour témoigner à nostre tres-cher & tres-amé Frere le Duc
 d'Orleans, que rien n'a esté capable de diminuer l'affection
 que nous auons tousiours eu pour luy. Nous voulons & or-
 donnons qu'apres nostre decés, il soit Lieutenant general du
 Roy mineur, en toutes les Prouinces du Royaume, pour
 exercer pendant la minorité ladite charge, sous l'autorité de
 ladite Dame Reyne Regente, & du Conseil que nous ordō-
 nerons cy-apres: & ce nonobstant la Declaration registree
 en nostre Cour de Parlement, qui le priue de toute admini-
 stration dans nostre Estat, à laquelle nous auons dérogeé &
 dérogeons par ces presentes pour ce regard. Nous nous pro-
 mettons de son bon naturel, qu'il honorera nos volōtez par
 vne obeysance entiere, & qu'il seruira l'Estat & nos enfans,
 avec la fidelité & l'affectiō à laquelle sa naissance & les gra-
 ces qu'il a receūes de nous l'obligent. Declarant, qu'en cas
 qu'il vint à contreuenir en quelque façon que ce soit à l'esta-
 blissement que nous faisons par la presente Declaration,
 Nous voulons qu'il demeure priué de ladite charge de Lieu-
 tenant general; Defendunt tres-expressément, en ce cas,

tous nos Sujets de le reconnoître, & de luy obeyr en cette qualité. Nous auons tout sujet d'esperer de la vertu, de la piété, & de la sage conduite de nostre tres-chere & tres-amee Espouse & Compagne, la Reyne mere de nos enfans, que son administration sera heureuse & auantageuse à l'Estat: Mais comme la charge de Regente est de si grand poids, sur laquelle repose le salut & la conseruation entiere du Royaume, & qu'il est impossible qu'elle puisse auoir la connoissance parfaite & si necessaire pour la resolution de si grandes & difficiles affaires, qui ne s'acquiert que par vne longue experience, Nous auons jugé à propos d'establir vn Conseil prés d'elle pour la Regence, par les aduis duquel, & sous son autorité, les grandes & importantes affaires de l'Estat soiét resoluës, suiuant la pluralité des voix. Et pour dignement composer le Corps de ce Conseil, Nous auons estimé que nous ne pouuions faire vn meilleur choix pour estre Ministres de l'Estat, que de nos tres-chers & tres-amez Cousins le Prince de Condé, & le Cardinal Mazarin; de nostre tres-cher & feal le sieur Seguier, Chancelier de France, Garde des Seaux, & Commandeur de nos Ordres; & de nos tres-chers & bien-amez les sieurs Bouthillier, Sur-intendant de nos Finances, & grand Tresorier de nos Ordres; & de Chaigny, Secretaire d'Estat & de nos Commandemens. Voulons & ordonnôs que nostre tres-cher & tres-ame Frere le Duc d'Orleans, & en son absence, nos tres-chers & tres-amez Cousins le Prince de Condé & Cardinal Mazarin, soiét Chefs dudit Conseil, selon l'ordre qu'ils sont icy nommez, sous l'autorité de ladite Dame Reyne Regente. Et commé nous croyons ne pouuoir faire vn meilleur choix, nous defendons tres-expressement d'apporter aucun changement audit Conseil, en l'augmentant ou diminuant pour quelque cause & occasion que ce soit: Entendant neantmoins, que vacation aduenant d'une des places dudit Conseil, par mort ou forfaiture, il y soit pourueu de telles per-

sonnes que ladite Dame Reyne Regente jugera dignes , par l'aduis du Conseil, & la pluralité des voix , de remplir cette place. Declaronz que nostre volonté est, que toutes les affaires de la Paix & de la Guerre, & autres importantes à l'Estat, mesme celles qui regarderont la disposition de nos deniers, soient deliberées audit Cōseil par la pluralité des voix. Comme aussi qu'il soit pourueu, cas escheant , aux Charges de la Couronne, Sur-intendant des Finances , premier President, & Procureur general en nostre Cour de Parlement de Paris, des Charges de Secretaire d'Estat, Charges de la Guerre, des Gouvernemens des Places frontieres , par ladite Dame Reyne Regente, avec l'aduis dudit Conseil , sans lequel elle ne pourra disposer d'aucune desdites Charges. Et quant aux autres charges, elle en disposera avec la participation dudit Conseil. Et pour les Archeueschez , Eueschez & Abbayes estans en nostre nomination , comme nous auons eue iusques à present vn soin particulier, qu'ils soient conferez à des personnes de merite & de pieté singuliere, & qui ayēt esté pendant trois ans en l'Ordre de Prestrie, Nous croyōs apres auoir receu tant de graces de la Bonté diuine , estre obligez de faire en sorte que le mesme ordre soit obserué: Pour cét effet, nous desirons que ladite Dame Reyne Regente, mere de nos enfans, suiue au choix qu'elle fera pour remplir les dignitez Ecclesiastiques , l'exemple que nous luy auons donné, & qu'elle les cōfere avec l'aduis de nostredit Cousin le Cardinal Mazarin , auquel nous auons souuent fait connoître l'affection que nous auons que Dieu soit honoré en ce choix. Et comme il est obligé par la grande dignité qu'il a dans l'Eglise, d'en procurer l'honneur , qui ne sauroit estre plus releué qu'en y mettant des personnes de vie exemplaire, Nous nous asseurons qu'il donnera de ses fideles conseils conformes à nos intentions. Il nous a rendu tant de preuues de sa fidelité & de son intelligence au maniement de nos plus grandes & plus importantes affaires,

tant dedans que dehors nostre Royaume, que nous auons
creu ne pouuoir confier apres nous l'execution de cét ordre,
à personne qui s'en acquitast plus dignement que luy. Et
d'autant que pour de grandes raisons importantes au bien de
nostre seruice, nous auons esté obligez de priuer le Sr de Cha-
steau-neuf, de la Charge de Garde des Seaux de France, &
de le faire conduire en suite au Chasteau d'Angoulesme, où
il a demeuré jusques à present par nos Ordres, Nous vou-
lons & entendons que ledit sieur de Chasteau-neuf demeure
au mesme estat qu'il est de present audit Chasteau d'Angou-
lesme jusques apres la Paix conelüe & executée: A la charge
neantmoins, qu'il ne pourra estre mis lors en liberté, que par
l'ordre de ladite Dame Reyne Regente, avec l'aduis dudit
Conseil, qui ordonnera d'un lieu pour sa retraite, dans le
Royaume ou hors du Royaume, ainsi qu'il sera jugé pour
le mieux. Et comme nostre dessein est de preuenir tous les
sujets qui pourroient en quelque sorte troubler le bon esta-
blissement que nous faisons pour conseruer le repos & la
tranquillité de nostre Estat, la connoissance que nous auons
de la mauuaise conduite de la Dame Duchesse de Chevreu-
se, des artifices dont elle s'est seruie jusques icy pour mettre
de la diuision dans nostre Royaume, les factions & les in-
telligences qu'elle entretient au dehors avec nos Ennemis
nous font juger à propos de luy defendre, comme nous luy
defendons, l'entrée de nostre Royaume pendant la Guerre.
Voulons mesme, qu'apres la Paix conelüe & executée, elle
ne puisse retourner dans nostredit Royaume, que par les
Ordres de ladite Dame Reyne Regente, avec l'aduis dudit
Conseil: A la charge neantmoins, qu'elle ne pourra faire sa
demeure, ny estre en aucun lieu proche de la Cour, & de
ladite Dame Reyne. Et quant aux autres de nos sujets, de
quelque qualité & condicion qu'ils soient, que nous auons
obligez de sortir de nostre Royaume, par condamnation ou
aurement, Nous voulons que ladite Dame Reyne Regente

ne prenne aucune resolution pour leur retour, que par l'aduis
dudit Conseil. Voulons & ordonnons, que nostre tres-cheré
& tres-amée Espouse & Compagne, la Reyne mere de nos
enfants, & nostre tres-cher & tres-amé Frere le Duc d'Or-
leans, fassent le serment en nostre presence, & des Princes
de nostre Sang, & autres Princes, Ducs, Pairs, Mareschaux
de France, & Officiers de nostre Coutonne, de garder &
observer le contenu en nostre presente Declaration, sans y
contreuenir en quelque façon & maniere que ce soit.
SI DONNONS EN MANDEMENT à nos amez & feaux les
Gens tenans nostre Cour de Parlement de Paris, que ces pre-
sentes ils ayent à faire lire, publier & enregistrer, pour estre
punctuellement gardées & obseruées, sans qu'il y puisse estre
contreueu en quelque sorte & maniere que ce soit : Car tel
est nostre plaisir. Et afin que ce soit chose ferme & stable à
tousiours, Nous auons signé ces presentes de nostre propre
main, & fait en suite signer par nostre tres-cheré & tres-amée
Espouse & Compagne, & par nostre tres-cher & tres-amé
Frere le Duc d'Orleans, & des trois Secretaires d'Estat, &
de nos Commandemens, estans de present près de Nous, &
fait mettre nostre seel. Donné à sainct Germain en Laye, au
mois d'Avril, l'an de grace mil six cens quarante-trois. E
de nostre regne le trente-troisième.

Ce que dessus est ma tres-expresse & derniere volonté
que veux estre executée.

Signé, LOUIS, ANNE, GASTON,
A costé, *Visa*. Et plus bas, PHELIPEAUX, BOVTHILLIER
DE GVENEGAUD, Et seellées du grand sceau de cire verte
sur lacs de soye rouge & verte : Et encor est écrit,

*Leues, publiées, registrées.; ouy ce requerant & consentant
Procureur general du Roy, pour estre executées selon leur forme &
teneur. A Paris en Parlement le 21. Avril mil six cens qu-
rante trois.* Signé, DV TILLET.



THE
NEWBERRY
LIBRARY





